

## Iud Iud letawa sumanailala mampo girumalena

<sup>1</sup> <sup>✡</sup>Ne Iud Iems wamba, ne ipa Iesu Keriso mebaawaida nolawa dewalala apanawa. Ne leta ema e mida Mamamba God apalene nuawadawadalena ita Iesu Keriso oniadewasaledia manlawo girumantedina. <sup>2</sup> God nuaparewa e baila, ita wanwan euda, do nuawadawadawa e manlawo mauralempe winompa. Niapo!

<sup>3</sup> Sumanai sosonaida, ne badowaida menanedio ina gagalowa no uduudu sumanaiwantitana umanawa girumanteapona. Tane tauma nuana insena gagalo da pokawaaida e baila girumanteapa. **Ne badowa dialedina sumanai gagalowa wadaiasaieno God apanawaida kakaibu mampo wisena baiwa badowa enonune onaitonuna. Sumanai gagalowa ema mai leusaitulepia rua, dia.**

<sup>4</sup> Ne gagalo ema girumantedina, ipawa apana isiwa mida mai God sawantoipona laga mampe sointone ekelesia bedeuwo odeiena. Apana sa Gagalo euda God nuawadawadawa amonawa umanawa waeuwakadisantoie ete ewanuauwa dewawa kadiwa mo dewasaia weregasai. Tane do no Tatamba Iesu Keriso debamambaida mo wakoasai. Mapoido buka bedewe mo matangelau umanawa girumalena winedia tauma donsai.

<sup>5</sup> <sup>✡</sup>Dima ne tauma wapaa baiwantedina e

---

<sup>✡</sup> **1:1:** Matiu 13.55; Mak 6.3    <sup>✡</sup> **1:5:** Nambas 14.29,30

uduudu atenla, tane ne menanede osowe wape nuala itupa. Dima mapo Israelwa mapo segalena insena: Tatamba God Israel apanawa uduudu bauta Isibt bedewe banlamono nomonaaubene inanton. Tane muriwa mida mo mai sumaintopona kadimon. <sup>6</sup> Ita ne ensel isiwa umanau gagalonteapo insamona. Mo muka Wadeiena God ituna rua nolawantope wampona, tane gonaau ainaboe mo muba mukau debamasapona baiwanton. God mo matangelau baiwa seni winakasalala mampe taudomono bola iwimpaida bedewe waimoia ideita kotu walamawa debamaia wisepio kotuntopu. <sup>7</sup> <sup>◊</sup>Tane mapo Sodom, Gomora, ita bola isiwa tampo wanwanlala apanawa muba etepu nina, ita dewa kiokiouida bedewe amonarebarebantoie waimoie. Apana sa mo epe dewalala no eueuwamba baiwa ia iikasalala bedewe mo muba matangelau pokawa etei.

<sup>8</sup> Apana mida umanau ne tauma wadina deawaa dewasai. Mo auwen bedewe eweie waie muba etepu miramirasai. Mo God ba apana eiau aiau waia mai eteipe ruawantoipona, dia. Tane do mukamukaua mai tawo ema osowe wanwanlala wakadisamoi. <sup>9</sup> <sup>◊</sup>Ensel ionoido ebowa Maikel mai epe dewasapona. Maikel Seitan nata Moses etepa wadapona baiwa wawantone dauwa etene atenlene Seitan mai aiawa kadiwa mampe diapona, dia. Tane me wane wanase, “Tatamba God e ando badowa dieepi!” <sup>10</sup> Tane laga apanawa sa dima mo mai atentoipona di wakadisantoi. Ita mo dewa isiwa insamoie dewamoia ipa pue insaisau rua, tane dewau ipa

---

<sup>◊</sup> 1:7: Bumpai 19.1-24    <sup>◊</sup> 1:9: Daniel 12.1; Gagalo 12.7

sa enepie mo kadimopi. <sup>11</sup> <sup>✧</sup>Mo ando kadiwaida rebareba donsapu! Apa Kein dewalena ruawa deawaa mo dewantoi. Do mo mane debama donsapona baiwa peroweta lagawaa Balaam dewawa kadiwa bedewe insaisau ituie baiwaidantoe waimoi. Apa ebowa Kora sala makowa bedewe Moses aiawa wandabuasana ruawa mo tauma deawaa dewansei, ita me ruawa kadi donsai. <sup>12</sup> Mo e nuawadawadala nanawa bedewe ia pimba ruau e bedelawo do wainilana, ita malasiawaia nana rebareba naie muba bupu nu-abobowantoi. Mo ipa lagawaau, ewaewau giou wisedie taudiboleidio unu wawa baiwaleidia rua. Lanunu wisedie giou suaubasadio nambe aleidio ita mai unu waipona, dia. Tane do mo ia tonapa ipawa itusiaawaia apapa boiaubeia ando tonaidantopua ruau. <sup>13</sup> Ne apapa ema osouwo eueuwa da itupa. Mo ewaewau rauwanaga owa tampe epedia rua. Ita mo dewau malawaa ipa sesempura miramiraua ruawa. Mo au kipora uboo intau eie nambe antoia ruau. God mo baibu bola iwimpaida winakasalala imasane ituno winede. <sup>14-15</sup> Adam atanosiwa Enok apapa lagawaau ema umanau bautasane wane wanase, “Tatamba God me enseliwa kakaibu uaraia do apapa uduudu kotumopua baiwa wimopu. Ita God mo mida me mai sawantopuna dewau kadiwa ita aiau badowa mo me mampe waiena baiwa kotu gagalowa wapie matangelamopi.” Enok ema epe wan.

<sup>16</sup> Apapa sa walama uduudu momoduntoie, sosou wawumoie, ita mo muba nuau insaisawa kadiwa ruawantoi. Mo ipa muba asou waie,

---

<sup>✧</sup> **1:11:** Bumpai 4.3-8; Nambas 22.1-35

ita aiau mampe sosou wau teinei muba euwau baiwa.

### *Ekelesia wasaibu gagalowa*

**17** Ne sosonaida, e dima Tatamba Iesu Keriso aposeliwa bauta dialeiena insenuna. **18** <sup>◊</sup>Aposel e dialene waienase, “Walama ompa osowe God ebowa wakadisasaia apanawa muba insaisau kadiwa asiasi antoia wimopu.” **19** Apana ipa sa aposel umanau waiena, mo e empuempulei. Mo bedeuwo Aleu kakaiwa dia, ete os apanawa lai.

**20 Tane e sosonaida, e eba sumanaila kakaiwaida waeuwa bedewe inawala du wadawada dewawa ruawa wadonune aitonuna. Ita Aleu kakaiwa e muka enaledie banlaledia rauparitonune wanlempa.** **21** Tatamba Iesu Keriso e nuaparelalepie inawinakasala enalepia onioniawaitile wainilana walamawe God nuawadawadawa bedewe deaitopa wanlempa!

**22** Ekelesiala bedewe apata inguguralala nuapareuitane wasaumona, mai emona. **23** Apata isiwa ia iilala bedewe antopua sawa kadi bedewe teinaaubamone inamona. Ita apata isiwa ete ewanuauwa kadiwa asiasi antoia nuapareuitonune saumonuna. Tane ewanadewaitana e mai mo tampoitana garau moawa wiralepio kadiu wadalepia sawa.

### *God wadaposiwa raupariwa*

**24-25** Tauma Godida no Inawamba ebowa wadaposisata! **Me ipa rua os saulepio sumanaila bedewe mai omena, ita banlalepio e God sapawaida do danawe enana. Do dewalepio e walama sawo nuaeum debama donsana,**

---

<sup>◊</sup> **1:18:** 2 Pita 3.3

Iud 24-25

v

Iud 24-25

**ita mai kadi da e bedelawo winepio ewepi,  
dia. No Tatamba Iesu Keriso bedewe God  
wadaposisanta! Me ipa debamawaida ita  
mukawaaida, nitu uduudu ipa me atowe.  
Sapaida me mampea tawo segasia walama we  
wisena, tauma ita ando winakasala! Amen.**

**Ina Sanaa Gagalowa**  
**The New Testament in the Kanasi Language of Papua**  
**New Guinea**  
**Nupela Testamen long tokples Kanasi long Niugini**  
copyright © 1996 Wycliffe Bible Translators

Language: Kanasi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 22 Feb 2024 from source files  
dated 31 Aug 2023

b27bd40e-e091-5268-bcbf-8232e1d7501a